

Studenc foresc a scola te la valèdes ladines

L professor Fortunato Bernard é coordenador e referent de la scomenzadiva per l Colegio Rotondi

Ciampestrin - Dai 22 ai 27 de juugn ruarà te noscia val n bel grop de studenc foresc per n projet de "learning week" che ge permetarà de cognoscer miec la mendranza ladina e sia cultura.

La Region Lombardia, defat, à proponet te chest an de scola la realisazion de setemènes de aprofondiment per i studenc di ùlimes trei egn de la scoles autes, ge dajan su a la scoles e ai Enc acreditè l'organisazion de desvalives projec, da endrezèr delaite de la scoles opura te lesc de sojornanza da d'istà.

Dachelanvia, l Colegio Rotondi, per sia prezenza e per l raport che l'à da presciapech 60 egn con la Val de Fascia, travers la struttura del "Soggiorno Dolomiti" a Ciampestrin, l'à proponet l'enconter co la storia e la cultura del pòpul ladin, ence

percheche l'é stat arsegurà la colaborazion de esperc e de istituzions del post. E coscità 25 studenc de la clasc terza e quarta del Liceo artistich e del Liceo scientifich de Gorla Minore, te la provinzia de Varese, se tramudarà te noscia bela val per veder e cognoscer più da vejin la mendranza ladina, sie lengaz e sia cultura e tradizions.

Coordenador del projet l'é l professor Fortunato Bernard che à metù jù n program de vijites e laboratories belebon pien e enteressant.

En lunesc ai 22 i studenc e si professores jirà a vijitèr l Museo, l'Istitut Ladin e la gejia de Sènt'Ugèna. L di dò i podarà doventèr per na di scultores e zipiadores ajache te la Scola d'èrt de Poza i arà ence l met de tor pèrt

a n laboratorie sperimentèl.

En mèrcol i se tramudarà duc te Gherdena per vijitèr l'istitut d'èrt, l museo ladin e la gejia de Sacum e en jebia enveze i pontarà demez per jir vin Badia olache i podarà veder l Museo ladin de Sèn Martin de Tor, la Val di Morins e l Santuarie de Oies de Sèn Giosef Freinademetz.

En vender sun Fedaa sarà la vijita al Museo de la vera e dapò a Col i podarà veder l'Istitut "Cèsa de Jan". En sàbeda, ùltim di del projet, tel Colegio Rotondi a Ciampestrin sarà l'enconter col conseier provinzièl Luigi Chiocchetti che rejonarà del valor culturèl e politich de la mendranza ladina.

I studenc serarà sù la vijita con n focus group final per se baratèr informazions e curiositèdes regoetes endèna la vijita te Val de Fascia. Chesta sarà na esperienza de "scola

neva" sporta a chest grop de studenc foresc che podarà viver ensema na setemèna te n ambient maraveous conjobian amicizia e arichiment culturèl. Na proponeta che se met dant de sostegnir l svilup de la competenzes personèles per didèr

i studenc a cognoscer e a se fèr ite te na realtà deldut desvaliva da la sia. E da l'autra man na opportunità per noscia valèdes e sia istituzions de se verjer e de se moscèr sia carateristiches con n eie ascort a la mendranza ladina.

